

Vildana Bešlija

Zastupnica u Skupštini Kantona Sarajevo
Sarajevo, 06.07.2026. godine

Uputiti:

Bosna i Hercegovina
Federacija Bosne i Hercegovine
Kanton Sarajevo
Skupština Kantona Sarajevo
n/r predsjedavajućem, g. Elvedin Okerić

Dostaviti:

Vlada Kantona Sarajevo

PREDMET: Zastupnička inicijativa i pitanja

Poštovani, na osnovu člana 106. Poslovnika Skupštine Kantona Sarajevo („Službene novine Kantona Sarajevo“, broj 41/12 - Drugi novi prečišćeni tekst, 15/13, 47/13, 47/15, 48/16, 9/20, 14/20 i 16/22), Vladi Kantona Sarajevo, Ministarstvu, odnosno nadležnim institucijama upućujem **inicijativu i pitanja u vezi provedenih aktivnosti u slučaju zlostavljanja djeteta u vrtiću „Bambini“**

Povodom slučaja zlostavljanja djeteta u privatnoj predškolskoj ustanovi “Bambini” prijavljenog početkom februara ove godine, koji je s razlogom izazvao veliku zabrinutost javnosti, molim da mi, kao zastupnici u Skupštini Kantona Sarajevo, dostavite odgovore na sljedeća pitanja:

- Da li je Ministarstvo, prije izdavanja odobrenja za rad ustanovi, provjerilo da direktor ispunjava uslove propisane Zakonom o predškolskom odgoju i obrazovanju?
- Ukoliko jeste, kako je moguće da je prosvjetna inspekcija naknadno utvrdila da direktor nije ispunjavao zakonske uslove za obavljanje te funkcije?
- Koje mjere je Ministarstvo poduzelo nakon zaprimanja inspeksijskog nalaza?
- Da li je pokrenut postupak preispitivanja ili ukidanja odobrenja za rad ustanove ili su poduzete druge mjere iz nadležnosti Ministarstva?

- Da li Ministarstvo planira izvršiti vanredni nadzor rada svih privatnih predškolskih ustanova u Kantonu Sarajevo kako bi se provjerilo ispunjavaju li zakonom propisane uslove za rad i zaštitu djece?
- Da li Ministarstvo planira izmjene propisa ili procedura kako bi se spriječilo da se ovakvi slučajevi ponove?

Slučaj vrtića Bambini ne smije ostati samo predmet krivičnog postupka protiv pojedinaca. Ovo je pitanje odgovornosti sistema.

Prema mojim informacijama, iz dostupnih inspeksijskih nalaza proizlazi da su utvrđene ozbiljne nepravilnosti u vezi sa ispunjavanjem zakonskih uslova za obavljanje funkcije direktora ustanove, dok se istovremeno vodi istraga zbog navoda o fizičkom i psihičkom zlostavljanju djeteta.

Ovaj slučaj dodatno potvrđuje zašto sam pokrenula inicijativu za zabranu fizičkog kažnjavanja djece kroz izmjene Porodičnog zakona. Nijedno dijete ne smije biti izloženo nasilju, poniženju ili zastrašivanju, bez obzira da li se nalazi u vlastitom domu ili u ustanovi kojoj su roditelji povjerali njegovo odrastanje. Naša je odgovornost da iz ovog slučaja izvučemo pouke i osiguramo da se ovakve situacije više nikada ne ponove, jer zaštita djece je odgovornost svih institucija. Smatram da svaki oblik nasilja nad djecom zahtijeva odlučnu reakciju institucija, ali i preispitivanje sistema nadzora i preventivnih mehanizama zaštite djece u vrtićima i školama. Dijete mora biti sigurno bez obzira na to da li nalazi kod kuće ili u obrazovnoj ustanovi.

Zato tražim da Ministarstvo dostavi potpunu informaciju o izdavanju dozvole za rad ove ustanove, izvršenim nadzorima i svim mjerama koje su poduzete nakon inspeksijskih nalaza. Također, smatram da je vrijeme za sveobuhvatan vanredni nadzor privatnih predškolskih ustanova u Kantonu Sarajevo kako bi roditelji imali povjerenje da svako dijete boravi u sigurnom okruženju.

Ne prejudicirajući ishod krivičnog postupka koji vode nadležni organi, očekujem da Vlada Kantona Sarajevo i Ministarstvo u okviru svojih nadležnosti preduzme sve potrebne mjere kako bi se utvrdilo da li je bilo sistemskih propusta i kako bi se osiguralo da se ovakvi slučajevi više ne ponove.

S poštovanjem,

Vildana Bešlija
Naša stranka, zastupnica

